

**BOSNA I HERCEGOVINA**  
**FEDERACIJA BOSNE I HERCEGOVINE**  
**VLADA**

**PRIJEDLOG**

**Z A K O N**  
**O IZMJENAMA I DOPUNAMA ZAKONA O POSEBNIM PRAVIMA DOBITNIKA**  
**RATNIH PRIZNANJA I ODLIKOVANJA I ČLANOVA NJIHOVIH PORODICA**

**Sarajevo, januar 2014. godine**

## **PRIJEDLOG ZA DONOŠENJE ZAKONA PO SKRAĆENOM POSTUPKU**

U skladu sa članom 172. stav 1. Poslovnika Predstavničkog doma („Službene novine Federacije BiH“, br. 69/07 i 2/08) i članom 164. stav 1. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), predlažemo da se **PRIJEDLOG ZAKONA O IZMJENAMA I DOPUNAMA ZAKONA O POSEBNIM PRAVIMA DOBITNIKA RATNIH PRIZNANJA I ODLIKOVANJA I ČLANOVA NJIHOVIH PORODICA**, razmatra i donese po skraćenom postupku, obzirom da nije u pitanju složen i obiman zakon.

Izmjene navedenog Zakona predlažu se jer postoji neodložna potreba da se provede presuda Ustavnog suda Federacije BiH broj: U-11/12 od 07.11.2012. godine, kojom je utvrđeno da član 1. Zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, broj 9/10), nije u saglasnosti sa Ustavom Federacije Bosne i Hercegovine.

# Z A K O N

## O IZMJENAMA I DOPUNAMA ZAKONA O POSEBNIM PRAVIMA DOBITNIKA RATNIH PRIZNANJA I ODLIKOVANJA I ČLANOVA NJIHOVIH PORODICA

### Član 1.

U Zakonu o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, br.: 70/05, 61/06 i 9/10), u članu 2. stav 1. iza riječi: "Orden zlatnog ljiljana sa srebrenim vijencem" dodaju se riječi:  
"Orden za vojne zasluge sa zlatnim mačevima  
Orden za vojne zasluge sa srebrenim mačevima".

### Član 2.

U članu 5. stav 2. mijenja se i glasi:

„Osnovica za utvrđivanje mjesečnog novčanog dodatka u tekućoj godini, prema ovom zakonu, jeste prosječna mjesečna neto plaća isplaćena u Federaciji Bosne i Hercegovine u prethodnoj godini, prema podacima Federalnog zavoda za statistiku (u daljem tekstu: osnovica).“

U stavu 3. iza riječi: "Orden zlatnog ljiljana sa srebrenim vijencem", dodaju se riječi:  
" Orden za vojne zasluge sa zlatnim mačevima  
Orden za vojne zasluge sa srebrenim mačevima".

### Član 3.

Član 5a. briše se.

### Član 4.

U članu 6. dodaje se novi stav 1. koji glasi:

„Članovi uže porodice poginulog, umrlog ili nestalog dobitnika ratnog priznanja ili odlikovanja iz člana 2. st. 2. i 3. ovog zakona, kao i članovi porodice korisnika prava iz člana 5. ovog zakona, nakon njegove smrti imaju pravo, odnosno nasljeđuju pravo na mjesečni novčani dodatak iz člana 5. ovog zakona.“  
Dosadašnji st. 1. do 5. postaju st. 2. do 6.

### Član 5.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

# **O B R A Z L O Ž E N J E**

## **ZAKONA O IZMJENAMA I DOPUNAMA ZAKONA O POSEBNIM PRAVIMA DOBITNIKA RATNIH PRIZNANJA I ODLIKOVANJA I ČLANOVA NJIHOVIH PORODICA**

### **I - USTAVNI OSNOV**

Ustavni osnov za donošenje ovog Zakona sadržan je u članu III. 2.e), u vezi sa članom III. 3 (3), Ustava Federacije Bosne i Hercegovine („Službene novine Federacije BiH”, broj: 1/94), prema kome federalna vlast, kada se radi o zakonima i drugim propisima koji su obavezujući na području cijele Federacije Bosne i Hercegovine, ima pravo utvrđivati politiku i donositi zakone iz oblasti socijalne politike.

Dakle, imajući u vidu citiranu ustavnu odredbu, federalna vlast ima pravo utvrđivati politiku i donositi zakone i druge propise koji su obavezujući na području cijele Federacije, svake od propisanih zajedničkih nadležnosti i bez predhodne saglasnosti kantona.

### **II – RAZLOZI ZA DONOŠENJE ZAKONA**

Izmjene navedenog Zakona predlažu se jer je Ustavni sud Federacije BiH presudom broj: U-11/12 od 07.11.2012. godine, koja je objavljena u “Službenim novinama Federacije BiH”, broj: 14/13, utvrdio da član 1. Zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica (“Službene novine Federacije BiH”, broj: 9/10), nije u saglasnosti sa Ustavom Federacije Bosne i Hercegovine.

Iz navedenih razloga predlaže se donošenje ovog Zakona po skraćenom postupku.

### **III – POJAŠNJENJE POJEDINIH ODREDBI**

Član 1. – ratna odlikovanja "Orden za vojne zasluge sa zlatnim mačevima i Orden za vojne zasluge sa srebrenim mačevima", koja su bila ispuštena, dodaju se u članu 2. stav 1. Zakona.

Član 2. - izmijenjen je stav 2. člana 5. u pogledu osnovice za utvrđivanje mjesečnog novčanog dodatka koju čini prosječna neto plaća isplaćena u Federaciji BiH u prethodnoj godini prema podatku Federalnog zavoda za statistiku. U stavu 3. dodaju se ratna odlikovanja "Orden za vojne zasluge sa zlatnim mačevima i Orden za vojne zasluge sa srebrenim mačevima".

Član 3. - ovim članom briše se član 5.a Zakona kojim je propisan cenzus za korisnike prava na mesečni novčani dodatak po osnovu ratnog priznanja ili odlikovanja.

Član 4. - ovim članom utvrđuje se da članovi uže porodice poginulog, umrlog ili nestalog dobitnika ratnog priznanja ili odlikovanja iz člana 2. stav 2. i 3. ovog Zakona, kao i članovi porodice korisnika prava iz člana 5. ovog Zakona, nakon njegove smrti imaju pravo, odnosno nasljeđuju pravo na mjesečni novčani dodatak iz člana 5. ovog Zakona.

Članom 5. -propisano je da Zakon stupa na snagu narednog dana od dana objavljivanja u „Službenim novinama Federacije BiH“.

#### **IV. FINANSIJSKA SREDSTVA**

Za provođenje ovog Zakona u Budžetu Federacije BiH, potrebno je osigurati dodatna finansijska sredstva u iznosu od cca 2.500.000, 00 KM, na godišnjem nivou.